

## SWISS IRONTRAIL

## Premiera gartageda



Currieders e curriedras dalla cursa da 44 km a Beiva.

FOTO MANUELA GROB

Radond 380 curriedras e currieders èn sa participos sonda passa agl amprem Swiss Irontrail ainten la Val Surses. Tenor comunicaziun digls organisatours è chella premiera gartageda. Schibagn l'ora scu er las temperaturas vegian procuru per ena cursa ampernevla.

## Success pigls Surmirans

Radond 160 dallas sportistas e digls sportists èn sa participos alla cursa sur 14 km e 546 meters d'otezza a Savognin. Gio siva 1:00:30,7 h è Marco Wildhaber dad Aesch curria sur la lengia d'arrev. Grond success è er gia igl Surmiran Livio Corsini da Lai cun esser curria scu sagond aint igl final. Tar las donnas è Laura Kessler dad Elgg stada la victoura, ella ò contanschia la lengia d'arrev siva 1:17:58,8 h ed en avantatg da radond 5 minutas avant la Grischuna Petra Casty da Trin Mulin.

La cursa da 44 km e 2015 meters d'otezza è stada ena sfeida pigls radond 220 sportists. Grond success è gia l'indigena Nina Carisch da Savognin cun gudagner la cursa cun en taimp da 5:56:40,5 h. E mademaintg segl podest scu terza è stada Tanja Willi da Lantsch. Cun en taimp da 4:15:59,4 h ò Dominic Funk da Samedan guadagna la cursa digls omens.

## Organisaziun eccellente

Scu tg'igls organisatour screivan seian schibagn sportists scu er igl comite d'organisaziun stos incantos digl amprem Swiss Irontrail. Igl percurs seia malgro malora digl de davant stada marcada a moda perfectga ed organisada fitg bagn. Er igls radond 80 voluntaris vegian presto fitg buna labour, chegl tgi vala er pigl team cuagl sarvetsch sanitar digl Center da Sanadad da Savognin. Per buna schort na vegl do nigns accidents. Ins seia an mintga cass motivo pigl proxim Swiss Irontrail igl onn 2023. (cdm/fmr)

## AMBULANZA GRISCHUN CENTRAL

## Nova basa a Lai



Las basas dall'ambulanza Grischun Central sa cattan a Tusang, Savognin e scu fasa da test a Lai.

FOTO MAD

Perchehl tg'igls sarvetschs dall'ambulanza Grischun Central èn s'augmentos – cunzont ainten la destinaziun da Lai – vign la basa da nov manada da Lai an pe da Casti anor. I sa tracta d'ena fasa da test digls 15 da fanadour anfignen igls 16 d'otgover 2022. Transitoricamaintg vign la basa a Casti sarada. Scu tgi stat scretg ainten ena comunicaziun allas medias è la dumonda s'augmentada, igl onn 2021 ins ò registro 1530 sarvetschs, igl amprem quartal digl 2022 è igl domber da sarvetschs s'augmento anc eneda.

L'ambulanza Grischun Central vign manada siva digl onn 2019 digls dus spitals da Savognin e Tusang. Las basas a Savognin, Casti e Tusang tgriran l'antiera regiun Grischun Central. Cun la decisiun da spustar la basa da Casti a Lai duess neir mi gliuro igl taimp d'ageid per paziantas e paziaints. La Val Alvra e la regiun da Farrera tgi èn mademaintg part digl provedimaint dalla sanadad dalla regiun Viamala/Alvra duessan venavant neir tgriradas optimalas dalla basa a Savognin anor. (cdm/fmr)



Cò igl model dalla tora alva dalla vista vers sid.

FOTO GION NUTEGN STGIER

# Da bunga speranza er schi la tor plai betg a tots

Agl Mulegns duess neir scretg istorgia d'architectura. Chegl cun realisar ena tor cun ena nova tecnologia da stampar betun. Igl è en project dalla Scola politecnica federala da Turitg e la Nova Fundaziun Origen. Costs dalla tor alva: 3,5 milliuns.

GION NUTEGN STGIER/FMR

An preschientscha da blers interessos, ma er da blers visitaders dallas produziuns digl Origen Festival Cultural è nia preschento igl schinumno «prototip» u detg pi concret en «demonstratur» dalla tor, en model digl terz plang dalla tor alva tgi duess neir realisada. Preschaintas eran er vers 20 persungas dalla Scola politecnica federala da Turitg. Ellas segnan per la planisaziun, per l'idea, per l'innovaziun e per la realisaziun da chel project. An veir senn duess la tor alva neir stampada cun betun e chegl d'en roboter e cun ena nova tecnologia da stampar. La Nova Fundaziun Origen ella è cunzont responsabla per la finanziaziun digl object e sa tgapescha er per la montascha dallas pitgas da betun stampadas digital, tenor la nova tecnologia da construcziun inventada dalla Scola politecnica federala da Turitg. Per chella nova moda da biagier èn dasperas en bel domber professours da plessas partizius (construcziun, tecnologia, statica da construcziun, materials da construcziun, geologia, svilup tecnic) er gio ples meis occupos èn blers students e studentas. Ena bunga part dad els ed ellas dereivan dall'Asia ed èn adegna puspe stos agls Mulegns per sa far en maletg digl li noua tgi la tor alva duess neir stampada cun la nova e moderna tecnologia. Per la realisaziun da chel project vign chinto cun investiziuns da 3,5 milliuns. Ainten chella somma èn cumpiglias igls costs dalla planisaziun, la construcziun sezza, la comunicaziun tg'è er da gronda impurtanza ed alloura er la documentaziun. Giovanni Netzer, igl president dalla Nova Fundaziun Origen è fitg optimist chegl tgi pertotga la finanziaziun digl antier project. La finanziaziun seia bagn ena veira sfeida, dantant realisabla.

## Sainza armadeira

Schinavant tgi la tor vign propi realisada alloura dues ella esser igl pi ot biert digl antier mond tg'è costruira cun la nova tecnologia digitala da biagier. Graztga a chella nova metoda da stampar sa redutgescha fitg igl quantum digl betun. Ultra da chegl è pussebel da construir igl object sainza armadeira. La tor alva duess neir construeida cun moduls da betun, uscheia tgi la montascha è simpla, chegl tgi vala er per la demontascha digls moduls. 30 meters duess ella aveir, la tor alva. Igl 2028 duess ella svaneir scu chegl tgi Giovanni Netzer ò testifigia alla FMR.



Cun ena crana èn las diesch pitgas neidas montadas.

FOTO NOVA FUNDAZIUN ORIGEN

## Tiers divers recurs ins è optimist

Per ansomma realisar chel project dovigl dus proceduras d'approvaziun. Gio igl favrer 2022 ò igl suveran da Surses do gleich verda alla midada da zona agls Mulegns cuagl resultat da 129:87 vouchs e cotras fatg an moda democratica la basa per cuntinuar cun l'idea da realisar chel project. Anc ò la regenza d'approvar chella midada da zona. Tant Giovanni Netzer scu er Leo Thomann, igl mastral digl cumegn da Surses, tots dus èn persvas tgi la regenza accpeta chella miadada da zona agls Mulegns. Las proximas emdas ins spetga sen ena rasposta da Coira. Gio alla fegn da chest meis chintan la Nova Fundaziun Origen e la Scola politecnica federala da Turitg cun la lubientscha da construcziun davart digl

cumegn da Surses, per alloura realisar da pre-maveira 2023 igl project cun ena pulita dimenisun. Tiers divers recurs tg'èn anc pendants, recurs perveia dall'otezza dalla tor alva, perveia digl maletg digl li e perveia dall'illuminaziun dalla tor alva, èn igls iniziants digl project scu er igl mastral digl cumegn da Surses da bunga speranza da realisar la tor alva. Realitad è tgi actualmaintg èn damai er giurists fatschantos cun chel project. Schi dat en resultat positiv pigls recurrents u en resultat positiv pigls iniziants dalla tor alva stat igl mument anc ainten las steilas. Realitad è tgi anc anfignen igl pi tard igl favrer 2023 resta igl schinumno demonstratur agls Mulegns, igl prototip tgi tradescha scu tg'igl project vign costruira.